

I. DISPOSICIÓN XERAIS

Consellería da Presidencia e Administración Pública

Decreto 91/1991, do 20 de marzo, polo que se aproba o Regulamento de integración dos funcionarios na Administración da Comunidade Autónoma de Galicia.

A Lei 4/1988, do 26 de maio, da función pública de Galicia, regula, no seu artigo 19, a integración dos funcionarios da Administración desta Comunidade Autónoma nos corpos creados por ela e ordena os ditos corpos en grupos en función da titulación esixida para o ingreso neles.

A disposición adicional primeira crea os corpos de Administración xeral e os corpos de Administración especial da Comunidade Autónoma, e nas disposicións segunda, terceira, cuarta e quinta sinalanse os requisitos necesarios para a integración nos citados corpos, dos funcionarios procedentes doutras administracións públicas.

Debido ó carácter xenérico da mencionada normativa, faise necesario establece-la regulación adecuada que permita concreta-la integración nos corpos propios da Administración da Comunidade Autónoma de Galicia dos funcionarios pertencentes ós distintos corpos e escalas das diferentes administracións. Non se debe confundir tal integración coa posibilidade dunha promoción, reclasificación ou acceso a outros corpos ou escalas doutro grupo diferente ó que actualmente pertencen ou nos que están integrados os funcionarios.

Por outra banda, o artigo 21 da citada lei atribúelle a dependencia orgánica de tódolos corpos de funcionarios á consellería competente en materia de función pública, sen prexuízo de que algúns deles poidan ser adscritos, funcionalmente, a determinadas consellerías.

En virtude do disposto na disposición adicional segunda e na disposición derradeira primeira da Lei 4/1988, que lle autoriza ó Consello da Xunta de Galicia para dicta-las normas de carácter regulamentario e demais disposicións que sexan necesarias en desenvolvemento da devandita lei, oída a Comisión de Persoal, por proposta do conselleiro da Presidencia e Administración Pública e logo da deliberación do Consello da Xunta de Galicia na súa reunión do vinte de marzo de mil novecientos noventa e un,

DISPOÑO:

REGULAMENTO DE INTEGRACIÓN

Artigo 1.º

O presente decreto ten por obxecto regula-la integración nos corpos creados pola Lei 4/1988, do 26 de maio, da función pública de Galicia de tódolos funcionarios que se atopaban ó servizo da Administración desta Comunidade Autónoma á entrada en vigor dela, así como daqueles que, con posterioridade á dita data, se incor-

poren a esta Administración en virtude de calquera procedemento legal de provisión de postos de traballo por transferencia ou por calquera outro sistema regulador da mobilidade interadministrativa.

Artigo 2.º

Segundo o previsto na disposición adicional segunda da Lei 4/1988, do 26 de maio, da función pública de Galicia, o persoal funcionario ó que se refire o artigo precedente intégrase nos corpos creados pola disposición adicional primeira da devandita lei, segundo se indica nos anexos I e II do presente decreto.

Artigo 3.º

Así mesmo, os funcionarios que se integran nos corpos creados pola Lei da función pública de Galicia adscribíense, con carácter xeral, á Consellería da Presidencia e Administración Pública, agás aqueles que nos anexos do presente decreto figuren expresamente adscritos a outras consellerías da Administración autonómica.

Artigo 4.º

1. Os funcionarios de prazas non escalafonadas transferidos doutras administracións ou que poidan selo serán integrados nos corpos que esixan igual titulación académica, coa consideración de a extinguir.

2. O persoal transferido como varios sen clasificar que posúa a condición de funcionario, atendendo á natureza das súas funcións e á titulación académica esixida, integrárase nos corpos que proceda segundo o previsto nos artigos anteriores, con recoñecemento da súa antigüidade.

3. O persoal transferido como varios sen clasificar que posúa a condición de laboral integrárase no cadro de persoal laboral, atendendo á natureza das súas funcións e titulación académica esixida, segundo o que establece o convenio colectivo único do persoal laboral da Xunta de Galicia.

4. Os funcionarios que foron transferidos á Comunidade Autónoma ou procedentes doutras administracións públicas incorporados a esta en virtude de oferta de emprego público ou de concurso permanente de traslado que, á entrada en vigor da Lei 4/1988, da función pública de Galicia, teñan asignado pola súa Administración de orixe un índice de proporcionalidade correspondente a un determinado grupo dos establecidos no artigo 19 da Lei 4/1988, e carezan da titulación académica esixida para iso, integráranse no corpo correspondente ó grupo co que foran transferidos coa condición de a extinguir.

DISPOSICIÓN ADICIONAL

Os funcionarios pertencentes a corpos ou escalas adscritos a unha determinada consellería que pasen a desempeñar postos de traballo noutra consellería, mentres dure esta situación, dependerán organicamente da consellería na que figuren adscritos e funcionalmente da consellería onde presten os seus servizos.

DISPOSICIÓN TRANSITORIAS

Primeira.

Co obxecto de que se produza a integración efectiva dos funcionarios transferidos no ámbito do presente decreto, os órganos competentes en materia de persoal realizarán, no prazo máximo de 6 meses, as correspondentes anotacións nos títulos ou documentos dos funcionarios afectados introducindo os datos da integración nos respectivos expedientes persoais e rexistros informáticos, co fin de que queden incorporados no Rexistro Xeral de Persoal da Xunta de Galicia.

Segunda.

Aqueles funcionarios que, con posterioridade á entrada en vigor do presente decreto, pasen a prestar servizos, con carácter definitivo nesta Comunidade Autónoma, por calquera dos procedementos legalmente establecidos, e pertencen a corpos, escalas ou subescalas non incluídos nos anexos do presente decreto, integraranse provisionalmente nos corpos creados pola disposición adicional 1.^a da Lei da función pública de Galicia respectando, en todo caso, o establecido no seu artigo 19, sen prexuízo de que con posterioridade se regule expresamente a integración do corpo, escala ou subescala da súa pertenza.

Terceira.

Mentres non se realice o desenvolvemento do presente decreto e durante o prazo máximo de un ano, os funcionarios que, pola súa procedencia ou funcións, figuren adscritos a unha determinada consellería continuarán dependendo dela.

DISPOSICIÓN DERRADEIRAS

Primeira.

Facúltase o conselleiro da Presidencia e Administración Pública para a adopción das disposicións oportunas, para o desenvolvemento do preceptuado no presente decreto.

Segunda.

O presente decreto entrará en vigor o día seguinte ó da súa publicación no *Diario Oficial de Galicia*.

Santiago de Compostela, vinte de marzo de mil novecentos noventa e un.

Manuel Fraga Iribarne
Presidente

Dositeo Rodríguez Rodríguez
Conselleiro da Presidencia e Administración Pública

ANEXO I

CORPOS DE ADMINISTRACIÓN XERAL

Grupo A. Corpo superior de Administración da Xunta de Galicia.

1. Intégranse no corpo superior de Administración da Xunta de Galicia e quedan adscritos á Consellería da Presidencia e Administración Pública os funcionarios dos seguintes corpos, escalas e subescalas:

—Asesores - inspectores a extinguir do suprimido Servicio Nacional de Asesoramento e Inspección de Corporacións Locais.

—Avogados do Estado.

—Economistas da Administración institucional de servizos socioprofesionais, a extinguir.

—Estatísticos da Administración institucional de servizos socioprofesionais, a extinguir.

—Estatísticos facultativos do Ministerio de Economía e Facenda.

—Facultativos superiores da Administración de servizos socioprofesionais, a extinguir.

—Facultativos superiores do Instituto Nacional de Enseñanzas Integradas.

—Inspectores financeiros e tributarios.

—Inspectores ó servicio da Administración educativa.

—Intervención e contabilidade do Estado.

—Intervención e contabilidade da Seguridade Social.

—Escala de intervención - tesourería de Administración local con habilitación de carácter nacional de categoría de entrada e superior.

—Letrados da Administración da Seguridade Social.

—Letrados da Administración institucional de servizos socioprofesionais, a extinguir.

—Letrados do Instituto de Reforma e Desenvolvemento Agrario.

—Oficiais instructores da xuventude, a extinguir.

—Secretarios da Administración local, con habilitación de carácter nacional de categoría de entrada e superior.

—Secretarios técnicos, a extinguir, da Administración institucional de servizos socioprofesionais.

—Sociólogos do Instituto da Reforma e Desenvolvemento Agrario.

—Superior de administradores civís do Estado.

—Superior de letrados do Ministerio de Economía e Facenda.

—Superior postal de telecomunicacións.